

**TITAH UCAPAN TUANKU CANSELOR  
DULI YANG TERAMAT MULIA TUANKU SYED FAIZUDDIN PUTRA  
IBNI DULI YANG MAHA MULIA TUANKU SYED SIRAJUDDIN JAMALULLAIL,  
RAJA MUDA PERLIS  
DI ISTIADAT KONVOKESYEN KETIGA, UNIVERSITI MALAYSIA PERLIS  
16 OGOS 2008, DEWAN 2020, KANGAR, PERLIS**

---

Bismillahirahmanirahim.

Dengan Nama Allah Yang Maha Pemurah Lagi Maha Mengasihani.

Assalamu`alaikum warahmatullahi ta`ala wabarakatuh dan Salam Sejahtera.

Alhamdulillah, Saya bersyukur ke hadrat Allah Subhanahu wa Ta'ala, kerana dengan limpah kurnia dan izinNya juga, maka dapatlah kita bersama-sama pada hari ini.

2. Saya mengalu-alukan kedatangan semua hadirin khususnya para ibu bapa dan penjaga para graduan bagi meraikan kejayaan anak didik masing-masing.

Hadirin sekalian,

3. Mula-mula sekali, Saya mengucapkan tahniah kepada Yang Berbahagia Tan Sri Dato' Dr. Syed Jalaludin Syed Salim di atas penganugerahan Ijazah Kehormat Doktor Kejuruteraan pada konvokesyen kali ini. Dengan pengalaman akademik dan korporatnya yang luas, Saya berharap beliau akan terus memberi sumbangan bakti kepada UniMAP dan masyarakat.

4. Saya juga mengucapkan syabas dan tahniah kepada semua para graduan kerana telah berjaya menamatkan pengajian masing-masing di UniMAP. Nasihat Saya kepada semua graduan ialah bahawa sesungguhnya menuntut ilmu itu, tiada akhiran dan batasannya. Teruskanlah mendalami bidang ilmu pengetahuan yang diceburi kerana ia berkembang seiring dengan perkembangan masa dan ia akan membuat kita tetap mutakhir sepanjang zaman. Agama Islam sendiri menyarankan umatnya menuntut ilmu sehingga ke liang lahad.
5. Saya suka menarik perhatian para graduan bahawa selain daripada ilmu pengetahuan tahap spiritual seseorang serta kemahiran lunak atau `soft skills` adalah tidak kurang pentingnya dalam pembinaan sahsiah para graduan untuk menjadi profesional yang holistik. Ia mempunyai hubungkait yang terus dengan kebolehpasaran graduan kejuruteraan di pasaran pekerjaan. Pihak industri selalunya mengidamkan tenaga profesional yang serba boleh bukan sekadar ijazah dan IQ nya sahaja tetapi yang dapat berkhidmat serta merta tanpa perlu dilatih semula, kecuali dalam bidang-bidang kritikal yang khusus dengan operasi, demi untuk meningkatkan daya saing mereka.

Hadirin sekalian,

6. Kepada pihak universiti pula, baik universiti kita UniMAP mahupun IPT-IPT lain, Saya suka menyarankan agar jalinan kerjasama antara universiti dengan pihak industri hendaklah diperkuuhkan demi untuk menghasilkan graduan kita yang berkualiti dan berintegriti. Kerjasama ini boleh datang dalam berbagai bentuk seperti "*internship*" dan sebagainya. Namun demikian, inisiatif yang lebih penting sekali ialah dalam usaha

penggubalan program-program dan kurikulum, yang bukan sahaja berorientasikan pasaran tempatan, malah antarabangsa untuk melestarikan para graduan kita kekal relevan dalam persekitaran kerjaya di sektor swasta. Saya rasa, sudah tiba masanya, seandainya ada program-program yang dirasakan kurang serasi dan tidak sepadan dengan kehendak pasaran masa kini, dikaji semula atau disepadukan untuk memastikan ianya dapat memberi manfaat kepada kedua-dua belah pihak. Pihak industri sepatutnya memberi ciri-ciri atau kriteria-kriteria kepakaran yang diperlukan manakala pihak universiti pula menyediakan acuan untuk membentuk individu-individu yang diperlukan oleh industri. Inilah yang dinamakan perkongsian pintar kepada kedua-dua pihak.

7. Kepada para mahasiswa UniMAP lain pula, serta para graduan juga, ingatlah! Sebagai usaha untuk meningkatkan kebolehpasaran para graduan di pasaran kerja, Saya ingin menekankan bahawa, mengambil kira persekitaran persaingan dunia yang makin sengit dan mencabar sekarang, para graduan universiti kita hendaklah berikhtiar melengkapkan dirinya dengan kelebihan-kelebihan tertentu yang sukar ditangani atau ditiru oleh graduan-graduan lain. Sifat-sifat kemahiran analitikal, sintesis, dan pemikiran kreatif serta kebolehan menambah nilai kepada sumber yang sedia ada, bertindak jauh di hadapan sebagai pemimpin serta berkeupayaan mengambil atau merujuk sumber pengetahuan di luar bingkai ilmu dan pemikiran yang sedia ada, harus ada di dalam diri masing-masing agar ianya dapat dimanfaatkan demi membangun dan mengukuhkan lagi kekuatan diri, masyarakat dan negara.

Hadirin sekalian,

8. Ramai di antara kita menguasai berbagai ilmu pengetahuan, tetapi amat sedikit yang menjadikan ilmu sebagai landasan untuk faedah umat manusia. Walaupun ramai cendekiawan di kalangan kita, namun penipuan dan keruntuhan akhlak dan moral semakin menjadi-jadi. Janganlah disalahgunakan ilmu pengetahuan sebagai penyebab kemasuhan alam sekitar dan kehancuran alam semesta. Saya amat menaruh harapan agar para graduan UniMAP yang sudah diterapkan pemikiran berminda positif dapat memahami senario ini dan berusaha untuk memainkan peranan masing-masing dengan sebaik mungkin walaupun di mana jua kita berada.
9. Pada hari ini juga Saya ingin mengulangi apa yang pernah Saya sebutkan sebelum ini bahawa masyarakat masa kini mengharapkan IPT seperti UniMAP, dapat menghasilkan graduan atau pemimpin yang berkaliber, rasional, bertenaga serta bersemangat tinggi yang dapat mengketengahkan dan memasarkan Malaysia di persada dunia. Graduan yang dihasilkan oleh UniMAP hendaklah juga mempunyai sifat-sifat unggul seperti berkeperibadian tinggi dan mulia, proaktif, patriotik dan cintakan negara, sensitif terhadap cabaran dan keperluan masyarakat, petah berkomunikasi di dalam pelbagai bahasa antarabangsa, berupaya menyesuaikan diri serta menarik manusia sejagat memandang tinggi dan menghormati Malaysia, bukan sahaja di rantau ini tetapi dunia keseluruhannya.

10. Orang ramai juga mengharapkan universiti kita akan dapat menghasilkan graduan yang terus kompeten, bergaya dan hebat berbicara dengan penuh kebijaksanaan di dalam alam perniagaan dan juga di meja perundingan. Graduan atau pemimpin yang dijana oleh UniMAP juga diharapkan berkemampuan untuk memperaga dan menggambarkan citra Malaysia di mata dunia sebagai sebuah kosmopolitan yang maju, moden serta mempunyai daya tarikan untuk para peniaga datang ke sini untuk berurusniaga. Kompetensi dan bakat bersilang disiplin di kalangan graduan adalah merupakan kelebihan yang amat dititikberatkan oleh majikan multi-nasional yang terkemuka dalam mendapatkan tenaga kerja kelas pertama. Oleh yang demikian, Saya suka menyarankan agar kita semua di UniMAP terus memberi penekanan dan fokus yang lebih kepada elemen pengantarabangsaan di samping meningkatkan lebih unsur-unsur pembelajaran berbanding dengan unsur-unsur pengajaran semata-mata demi menghasilkan graduan dan bakal pemimpin negara yang berketerampilan dalam konteks hari ini dan masa hadapan.

Hadirin sekalian,

11. Sebelum mengakhiri titah ucapan, Saya sekali lagi ingin mengucapkan syabas dan tahniah kepada semua graduan dan ibu bapa. Sebagai alumni UniMAP, janganlah sesekali lupakan universiti kita ini dan kembalilah untuk menabur bakti untuk kemajuan dan terus mengangkat martabat universiti.

12. Tahniah Saya ucapkan kepada Pengerusi dan Ahli-ahli Lembaga Pengarah Universiti, Naib Canselor, pihak pengurusan universiti serta seluruh usrah UniMAP yang telah berjaya meletakkan kedudukan universiti

ini sebaris dengan yang terdahulu daripadanya. Saya yakin UniMAP akan terus menjadi sebuah universiti yang mantap dalam semua bidang dan kekal relevan sebagaimana yang dihasratkan pemegang taruhnya di selaras dengan moto universiti yakni : **Ilmu, Keikhlasan, Kecemerlangan.**

13. Akhir titah, Saya sebagai Canselor, dengan diiringi sokongan padu daripada Kerajaan Persekutuan dan juga Negeri, Saya akan memberi sepenuh komitmen untuk terus menaungi UniMAP ke tahap yang lebih gemilang dan menjadikannya terkemuka, sebagai sebuah universiti teknikal berfokus yang efisyen, inovatif dan terbilang.

14. Saya berdoa semoga Allah Subhanahu wa Ta'ala akan memberkati majlis kita pada hari ini dan memelihara perjalanan para hadirin sekalian ketika pulang ke destinasi masing-masing. Insya-Allah.

Terimalah serangkap pantun untuk para graduan.

**Pengat pisang, gulai labu  
Asal santan dari kelapa  
Keringat bapa, air mata ibu  
Jangan graduan mudah lupa**

Sekian.

Wabillahi taufik walhidayah wassalamu'alaikum warahmatullahi ta'ala wabarakatuh.

Terima Kasih.